



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

Komunikadu Imprensa

Munisipiu Aileu

Agostu 2016

Komunidade Suku Faturilau ezije prezensa autoridade estadu iha suku izoladu hodi fahe informasaun kona-ba lei aplikavel sira

Komunidade Suku Faturilau ezije prezensa autoridade estadu iha suku izoladu hodi fahe informasaun kona-ba lei aplikavel sira. Ezijensia ne'e hato'o através hosi atividade treinamentu kona-ba "Demokrasia no Kna'ar Parlamentu iha prosesu halo Lei" iha Suku Faturilau, Postu Administrativu Lekidoe, Munisipiu Aileu ne'ebé JSMP organiza iha 27 Jullu 2016. Treinamentu ne'e hetan partisipasaun másimu husi komunidade no estruktura suku sira. Total partisipantes ne'ebé partisipa iha treinamentu ne'e hamutuk nain 30; kompostu husi Feto nain 15 no mane nain 15.

"Ezijensia ne'e pertinenti tebes tamba komunidade barak iha área remotas isola-an hosi informasaun inklui mós suku Faturilau rasik no tanba ne'e, instituisaun estadu sira, liu-liu ministério justisa tenke sente saida mak komunidade sira apresenta", dehan Diretór Ezekutivu JSMP, Luis de Oliveira Sampaio

Durante treinamentu komunidade sira hato'o sira nia preukupasaun kona-ba dinámika demokrasia iha Timor-Leste. Komunidade sira katak ema barak uja demokrasia la-tuir nia dalan loloos no uja demokrasia no liberdade la iha limita hodi prejudika mós ema seluk nia direitu atu goja. Aleinde ne'e, komunidade sira mós preukupa no ezije ba Governu no Parlamentu Nasional atu aselera lalais diskusaun no aprovasaun kona-ba Lei ba Rai.

JSMP mós konsidera ezijénsia komunidade atu aselera Lei Titularidade ba Rai ne'e importante no real tebes. Tanba ne'e Parlamentu Nasional tenke se tilun ba preukupasaun hirak ne'e hodi aprova lei ne'e no fasilita povu atu rezolve probelma rai entre komunidade no komunidade ho estadu ka grupu interesadu sira selu tuir previzaun esbosu lei ne'ebé sei estabelese iha lei refere.

Iha oportunidade ne'e JSMP mós apresenta katak ezbosu Pakote Lei Rejime Espesial ba Titularidade ba Bens Imoves prosesu ne'ebé oras ne'e la'o hela iha Parlamentu Nasional. Mesmu nune'e, tanba oras ne'e dadaun PN iha hela resesu parlamentar nian, no PN promove katak sira sei diskuti no aprova depoisde fila fali hosi resesu parlamentar. JSMP mós informa kona-ba polémika seluk relasiona Kapítulu VIII kona-ba despezu administrativu ne'ebé antes ne'e Governu hasai tiha hosi esbosu lei ne'e no JSMP ho koaligasaun Rede ba Rai husu atu mantein kapitulu ne'e atu asegura protesasaun espesial hasoru despezu sira.

Iha enseramentu ba treinamentu ne'e, Xefi Suku Faturilau, Sr. Zacarias da Costa agradece no konsidera importante tebes prezensa JSMP iha suku izoladu hanesan Faturilau. Programa ne'e importante hodi fahe informasaun ba komunidade sira atu komunidade sira bele hatene no kompriende lei aplikável sira. Sr. da Costa husu ba partisipantes sira ne'ebé partisipa atu bele fahe tan informasaun hirak ne'e ba iha komunidade sira iha ida-idak nia aldeia hodi sira rona no kompriende informasaun hirak ne'e.

Rua setubal, Colmera, Dili Timor Leste

PoBox: 275

Telefone: 3323883

www.jsmp.tl

Facebook: www.facebook.com/timorleste.jsmp

Twitter: @JSMPtl

Treinamentu ne'e hetan Apoiu Finansieru husi VI Governu Konstitusional, liuhosi Kordenador Gabinete Apoiu Fundu Sociedade Sivil.

Atu hetan informasaun liutan favor kontaktu direktamente:

Luis de Oliveira Sampaio

Diretór Ezekutivu JSMP

E-mail: luis@jsmp.minihub.org

Telefone: 3323883 | 77295795

www.jsmp.tl

Facebook: www.facebook.com/timorleste.jsmp

Twitter: @JSMPtl